



# Banco Central di Aruba ta reacciona riba ponencianan infunda y eroneo di sr. Arjen Alberts

manera publica den Bon Dia “Arjen Alberts: posicion di florin na peligro”



**DESDE** Status Aparte, cu crisis of sin crisis economico-financiero, Gobiernonan di Aruba, sin excepcion, a fia riba mercado local sin cu esaki tabatin impacto riba e tasa fiho di nos florin pa cu dolar Mericano, esta Afl. 1.79. E motibo principal cu Gobiernonan mester a fia ta cu un par di biaha so Gobierno di Aruba tabatin un surplus riba su posicion financiero den e casi 35 aña cu a transcuri.

A pesar di esey y cu of sin crisis, nos florin desde 1986 a mantene su balor fiho contra e dolar menciona anteriormente, cual ta hancra den ley, manera ta publica diariamente riba website di Banco di Central di Aruba (BCA). Independiente di e maneho fiscal di Gobierno di Aruba, sea restrictivo of expansivo, a base di circunstancianan economico-financiero, BCA como instituto autonomo semper a hiba y lo sigui hiba un maneho monetario prudente solamente cu un meta, esta mantene e tasa fiho di florin contra e dolar Mericano, cual t'e fundeshi di confianza den nos florin. Esey ta un di su tareanan principal manera stipula den ley, cu ta disponibel riba BCA su website.

Pa stipula y implementa un maneho monetario prudente y asina mantene confianza den nos florin, BCA tin suficiente instrumento legal, cu e ta aplica efectivamente, entre nan medidanan di divisa, cu cual a crea y a mantene semper un nivel di divisa cu ta suficiente pa cubri diferente luna di importacion y otro tipo di servicionan crucial pa nos pais, riba cual por cay bek den un situacion di crisis unda entrada di divisa por ta (severamente) limita. E reserva di divisa ta Aruba su buffer internacional principal. E ponencia di sr. Arjen Alberts cu “Nos no tin un economia propio. Tur cos cu dreña ta sali na divisa”. Y “Nunca e reservanan tabata suficiente” ta infunda, ta completamente eroneo y ta carece conocimiento basico di nos economia.

Desde maart di e aña aki debi n'e situacion di crisis relaciona cu Covid-19, BCA a tuma

varios medida pa mantene y garantiza cu nos divisa ta na un nivel sostenibel di acuerdo cu benchmarknan internacional. Como parti di transparencia di su maneho monetario, ta publica tur decision di BCA riba e tereno aki (<https://www.cbaruba.org/cba/readBlob.do?id=6310>). E recien medidanan di divisa ta disponibel riba website di BCA pa cualkier analisis y tambe con nos nivel di divisa ta desaroyando su mes, incluso inflacion cu sigur ta un indicador importante, particularmente den e contexto di e posicion competitivo di Aruba contra otro paisnan regional. Tambe por menciona cu den transcurso di añanan, e maneho monetario di BCA a wordo evalua dor di Fondo Monetario Internacional (FMI) consistentemente, a base di e asina yama “Article IV missions”. A base di evaluacionan aki, FMI tambe a confirma e maneho prudente monetario den su raportnan cu ta disponibel riba nos website.

Pa kita tur duda, BCA ta informa adicionalmente cu e reservan oficial di divisa a nota un subida di Afl. 422,7 milyon te cu 28 di augustus 2020, compara cu fin di december 2019. Alabes e reservan internacional (incluyendo e diferencia di reevaluacion di oro y bononan internacional) a aumenta cu Afl. 358,2 milyon, e.o. pa motibo cu actividad economico, y consecuentemente consumo domestico y importacion, a cay significantemente dor di fiansanan internacional di Gobierno di Aruba, incluso obteni for di Gobierno di Hulanda, y e medidanan restringente di BCA riba tereno di divisa. Consecuentemente, e reservan oficial y e reservan internacional a yega te na, respectivamente, Afl. 2.187,5 milyon y Afl. 2.257,8 milyon riba 28 di augustus 2020, cual ta pieknan mas halto cu a wordo registra.

Di e manera aki e nivel di reservan ta cubri mas cu 10 luna di importacion. Ademas, e reservan ta cubri 104,4% di e nivel optimal basa riba e metrico recien aplica dor di FMI, esta e asina yama ‘Assessment Reserve Adequacy’ (ARA).

Consecuentemente, e entrevista cu sr. Arjen Alberts den Bon Dia den cual, fuera di otro ponencianan incorrecto, e ta declara cu “dentro di algun siman, ni luna, florin lo perde su balor contra e dolar” ta infunda, ta sin base apropia monetario y financiero y no ta tene cuenta cu datonan publica. Tambe su declaracion “ta mescos cu si Gobierno ta saca placa di Banco Central y ta laga print” ta completamente eroneo, y por informa aki cu contrario na hopi pais, BCA desde su establecimiento na 1986, nunca a fia Gobierno di Aruba un cen y por confirma esey tambe den su cuentanan anual cu ta publica riba su website. Semper Gobiernonan mester a busca un solucion riba mercado pa nan fianza, p'asina proteha nos florin.

Di mesun forma, e informacion cu sr. Arjen Alberts a duna tocante inflacion ta incorrecto. Publicacionnan mensual di Bureau Central di Estadistica ta mustra claramente un bahada gradual den e tasa di inflacion den 2020. E inflacion, midi a base di e cambio den e indice di CPI, tabata 0,0 porciento den juli 2020, compara cu e mesun luna di e aña anterior. E promedio di inflacion di 12-luna a baha te na 3,3 porciento na juli 2020, compara cu e nivel di 4,6 porciento cu el a yega na februari y maart 2020. E promedio di inflacion di 12-luna ora exclui e componentenan di energia y cuminda ta 2,9 porciento na juli 2020.

E expectativa ta cu e tasa di inflacion lo sigui baha den e resto di aña aki, debi e.o. na un reduccion den tarifa di coriente desde 1 di januari 2020, e ausencia di e efecto di e introduccion di BAVP, y tambe, asumiendo un prijs mas abou y stabil di crudo ademas di ningun aumento den impuesto.

BCA ta lamenta cu sr. Arjen Alberts, den su entrevista cu Bon Dia, ta malinforma y publico usando declaracionnan infunda y incorrecto cu ta carece conocimiento basico monetario-economico aplicabel pa nos isla y inecesariamente ta crea asina desconfianza den nos florin sin ningun base corecto.